

1 enformaziuns y termins

Conzert: en domegna ai 7 d'aorí ales 20:30 él te dlijia d'Al Plan n concert con Angela Palfrader y Margareth Huber (vidores), Renzo Huber (tenor) y Simon Brandlechner (orgo) con musiga de G. Muffat, G. F. Sances, A. Vivaldi, Chr. Bernhard y David Pohle.

KVW Senioreclub: en dedemesaledema ai 10 d'aorí s'encuntun ales 13:00 sön plaza dal Cone, por jí a se fá na spazierada a Natz, fora por i lens da pom en flu. Dedô él picia marena.

Sorvise ai Jogn: al ven lascé alessi che tai proiec "cool summer" a "my summer" (5 cl. scora elementara - 2 cl. scora alta) él ciamó posc ledi por: Jí a ciaval tla natöra - Curs da nodé - Young gospel-Choir-Soul da ciarcie - Party planner - La ligreza por le cují - Edema d'aventöra a Riccione - Cujiné a corusc - Adrenaline week. Iscriziuns y enformaziuns sot ala plata dai proiec www.proiec.org: login da pert dal genitur, selezioné le möt co é belo scrit ete y meter lapró l' edema co é a disposiziun. An pó ince cherdé sö le Saj, ☎ 0474 523070.

Mostra de dessegn: la Cassa Raiffeisen lascia alessi che dai 9 ai 19 d'aorí pón vijité, dal lönesc al vendres dales 14:25 ales 16:15 tal salf dla Cassa Raiffeisen a Al Plan, la mostra dal 49. concurs de dessegn dal tema "La musiga emozioneia" realisé dai scolars dla scora elementara y mesana da Al Plan, La Pli y Rina.

Ciasa de Palsa: la Ciasa de Palsa Ojöp Freinademetz a San Martin de Tor chir: 2 infermieres profesionale con bi/trilinguism a tamp plen y/o parzial
2 operadesses sozio - assistenziale con bi/trilinguism a tamp plen y/o parzial
2 operadesses sozio - sanitarie con bi/trilinguism a tamp plen y/o parzial
1 na educadessa sozuala con bi/trilinguism a tamp plen
Por informaziuns plü avisa pón cherdé sö, ☎ 0474 524 786.

Zenter Families Mareo/1: le ZFM met da jí "Ginastica por mitans dla scora mesana" con Marta; les encuntades sará dai 10 d'aorí ennant vigne dedemesaledema (7 iadi). Cost 35,00 € por soci y 55,00 € por i atri. Da se prenoté anter i 6 d'aorí pa Marta, ☎ 339 7384558.

Zenter Families Mareo/2: le ZFM envia i mituns dla scora elementara y mesana acompagnés da en genitur a fá la coa da Pasca de preza con Rosmarie, en dedemesaledema, ai 10 d'aorí ales 15:00 sö da Rosmarie (sö Pipa – Ches Costes 5) Le cost é de 5,00 € por soci, 25,00 € por i atri. Da se prenoté anter i 8 d'aorí pa Rosmarie, ☎ 339 5912655 (max 10 partezipanc).

Enteressenza de Fanes: düc i paurs co met a munt te Fanes è enviés ala sontada generala con lita dal consei nò en domegna ai 14 d'aorí ales 11:00 tla Gran Ciasa.

Döt le bun a:	Rosa Maneschg ved. Erlacher <i>San Sciomun</i>	* 09.04.1939
	Paola Maria Palfrader	* 10.04.1933
	Maria Anna Ellecosta, <i>Trens</i>	* 12.04.1936
	Tone Kehrer, <i>Nikolsdorf</i>	* 12.04.1944
	Giovanni Pedevilla, <i>San lére</i>	* 13.04.1938
	Tone Feichter	* 13.04.1938
	y a düc chi co á santennom y complesc i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina le dedemesaledema sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploian: Signor Heinrich Perathoner
E-mail: ploania@gmx.net

Calogna Al Plan: 0474 501006
Radio de Ploania: 93,00 MhZ

UNITÉ PASTORALA



Ann C

07.04.2019 - Cuinta domegna de Carsema

n. 19

Dede ota con döt le cör dal Signur; deach'al é graziont y misericordius, paziont y rich de bunté.

☞ Is 43, 16–21 | Fil 3, 8–14 | Jan 8, 8–11

Dal Vangelo do San Jan:

Te chel tomp ¹é Gejú jü sön la Munt dal Orí. ²Da doman adora él endô jü tal templ. Döt le popul gnea da d'el, y el s'á sonté jö y l'istruí. ³Danló ti á i stüdiés dla lege y i farisês condüt na era, gnüda abinada söl fat de rumpí le matrimone. Ai l'á metüda amez ⁴y ti á dit a d'el: Maester, cösta era é gnüda abinada söl fat ch'ara rompí le matrimone. ⁵Mosé nes á scrit dant tla lege che de te' eres é da spedré. Sen, ci nen dijeste pa tö? ⁶Con cösta domanda orêi le meter ala proa, por avei na gauja de le denunzié. Gejú endere s'á cüfé jö y s'á motü a scrí con le deit ia por tera. ⁷Canch'ai sighthä da le damané ennant, él loé sö y ti á dit: Chel de os co é zonza picé dess por pröm sciüre na pera cuntra d'era. ⁸Al s'á endô cüfé jö y sciea ennant ia por tera. ⁹Do ch'ai â albü aldí söa resposta, s'an ésaí jüs önn endolater, danfora i plü vedli. Gejú é romagnü endô su con l'era co ea ciamó danló amez. ¹⁰Al é loé sö y ti á dit a d'era: Era, olá ésaí pa? Ne t'á condané degügn? ¹¹Ara á respognü: Degügn, Signur. Danló ti á dit Gejú: Gnanca iu ne te condaneii. Va, y da sen ennant no plü fá picé!

Oraziun dal de

Periun! Signur, nosc Dio, por amur al monn s'á to Fi sorandé ala mort: láscesse resté te so amur y con töa grazia vire de söa forza. Do cösc te periunse por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.

(Lezionar C)

Vire la Carsema

Jan 8, 8–11

Gnanca iu ne te condaneii.

Va, y da sen ennant no plü fá picé!

Impuls: I ó baié y cunté le bun de vigne porsona!

☞ Letöres dla Domegna dal orí | Festa dal ingres de Gejú a Ierúsalem:
Lc 19, 28–40 | Is 50, 4–7 | Fil 2, 6–11 | Lc 22, 14 – 23, 56

Edema liturgica dai 07.04. ai 14.04.2019

DOM 07. 08:30	Cuinta domegna de Carsema <i>Jan Baptist de la Salle, Albert</i> gran messa por dōta la ploania y devoziun a Santa Maria s.m. por †† Pire y Rosa Willeit da Sach y † Maria Willeit, Ansele ♫ <i>Sabina Willeit, Giorgio Fasciolo (orgo)</i>
→ 19:30 10 y 18	Via Crucis con grups y uniuns <i>s.m. a Al Plan</i>
Lön 08. →	<i>Walter, Beata</i> de d'oraziun personala y te familia
Ded 09. → 19:30	<i>Waltraud, Konrad</i> preparaziun y pissia da Pasca por l'Uniun dles Eres <i>con sig. Hans Maneschg y sig. Pio Dapré,</i> s.m. con Comegnun da Pasca s.m. de rengraziamont a Santa Maria por la familia dal Craizer
Dem 10. → 19:30	<i>Engelbert, Hulda, Magdalena G.</i> les Staziuns con l'Uniun dles Eres
Jöb 11. → 19:30	<i>Gemma Galgani, Stanislaus</i> preparaziun y pissia da Pasca por l'Uniun dai Ei <i>con sig. Hans Maneschg y sig. Pio Dapré,</i> s.m. con Comegnun da Pasca s.m. por † Herbert Morlang, Parü s.m. por †† Jep, Rosa y Maria Ellecosta, Lüchesc
Ven 12. → 19:30	<i>Zeno, Herta</i> → astinonza dla cern zelebrazion dla Parora de Dio
Sab 13. → 19:30	<i>Martin I., Ida</i> preparaziun y pissia da Pasca por la Joneza <i>con sig. Pio Dapré,</i> s.m. con Comegnun da Pasca s.m. por †† Germano y Maria Frontull, Mareo
DOM 14. 08:30 10 y 18	Domegna dal ori <i>Valerian, Lidwina, Erna</i> FESTA DAL INGRES DE GEJÚ A IERÚSALEM benedisciun dal belorí jö dal paiun, prozesciun te dlijia, gran messa por dōta la ploania con la Pasciun do San Lüca <i>s.m. a Al Plan</i>
<i>ampola:</i>	do intenziun de Paola Palfrader, La Pli
<i>ministronc:</i>	▶ da doman y domegna: <i>Valentina y Lucia</i> ▶ da sera y domegna: <i>Rafael y Cecilia</i>
<i>i recordun:</i>	Pire Mutschlechner, <i>Al Plan</i> + 08.04.2010 Germana Lanz Pezzei, <i>Schweiz</i> + 10.04.2014



Ci figura! (Jan 8, 8–11)

I ponsi do

Degüna porsona ne dess iudiché en n'atra. Gejú nes recorda ch'i sun düc piciadús y ch'i án debojügn dal pordonn de Chelbeldio. Porchel messunse ince nos ester misericordiusc con i atri. La era co á falé va demez renovada dal'encuntada con Gejú. Ma el nes dá la forza por superé le mal y cialé endó ligreza y serenité.

I preii ensciö

I amireii töa calma y töa sapionza, Signur Gejú. Catö ch'i pó le dí: ci figüra che te i as fat fá a chi farisês plens de superbia y de presunziun! I sa che te n'os nia aldí cöstes cosses ... mo i ess tan ienn orü tó pert a che scena y odei le müs de chi co s'an jea demez y sciürâ les peres ia por tera empede i les trá ados a che püra era. Te sas da fá gní confusc i superbi, te ciales les dertes parores por fá gní pici chi co mina da ester miús, te sas da paré demez la veia do vendeta y de iustizia falza ch'i sontiun gonot te nos. Dásse l'umilté y fá ch'i odunse ete nostes deblezes, ch'i ne iudicunse mai con aroganza chi co fala. Dísse ince a nos düc ches parores de confort y de speranza: "lu ne te condaneii nia, vá y da sen ennant no plü fá picé!"



Vita de ploania y de paisc

- **Pilora da Pasca 2019:** la pilora da eniann á desco tema le Spirit Sant y le sacramont dla confermaziun. Ara dess ester en envit a perié con y por i crejimanc y a ponsé do a nosta vocaziun desco cristiagn.
- **Domegna dal ori:** i sun düc canc enviés da jí jö n plaza dan le paiun a tó pert ala benedisciun dal belorí por podei ensciö ince fá dedò düc deboriada na bela prozesciun te dlijia!
- **Confermaziun 2019: en vendres, ai 12 d'aorí, ales 14:30,** sarál te salf dles manifestaziuns d'Al Plan na encuntada con signor **Markus Moling**, co aministreaia ai 26 de ma a Al Plan le sacramont dla Confermaziun. Düc i mituns y les mitans co ciafa le sacramont dla crejima con geniturs, toc y totes é der bel enviés.
- **Joneza da Paur:** la Joneza da Paur organiseia **en jöbia ai 11 d'aorí** ales 20:00 te Ciasa dles Uniuns na sera con le „Profanter KG“ olache an pó gní a proé y se cumpré guant da laoré te bosch a en miú prisc. Düc e der bel enviés.



Unité Pastorale Val Badia

I grups de laur matrimone y familia y düc chi co á enteres é enviés a na encuntada con **Johanna Brunner**, direturia dal ofize matrimone y familia dla diozeja, en dedolönesc, ai 9 d'aorí ales 20:00 tal Istitut ladin Micurá de Rù. Le tema è **“Mituns y dlijia”** y ara se baiará de poscibilités y formes co nes deida ester adöm, se sontí comunité y ester deboriada dlijia.